

Rene Herdé

Ami ta un Trupial



“E ta sin duda e miho experiencia educativo pafo di mi famia cu ami tabata tin como mucha. E experiencianan den e club di “Trupial” a yuda determina e resto di mi bida. Mi a haci bon uzo di tur loke mi a siña como Trupial den mi estudio, den mi bida personal y te awe den mi trabou profesional. Cu orguyo mi ta menciona mi añanan den club di Trupial. Tambe den mi

resumen di educacion y experiencia personal.” Na palabra ta Rene Herdé, awe lider di fraccion di partido AVP den Parlamento di Aruba. Prome cu esey e la traha pa hopi aña den enseñansa y den sector di turismo. Rene Herdé a lanta den e bario di Companashi. Un bario chikito conoci pa e cantidad grandi di musico, cantante, grupo musical, deportista, politico, empresario y lider social cu a lanta den e bario aki. Hopi di e hobennan aki y otronan cu despues a ocupa posicionnan importante den nos comunidad, na un momento of otro tabata miembro di e club hubenil di Trupial. Rene Herdé mes a siña toca cuatro instrumento musical den club di Trupial. E tabata miembro di tres diferente banda musical di Trupial. Cu un di e bandanan

musical aki e la gana dos festival di cancion. E la hunga den diferente comedia den “club”. Rene Herdé: “Tur loke nos a siña na canto y musica ta keda cu nos pa semper como algun di e momentonan mas bunita di nos bida. Pero e rol mas grandi cu Trupial a hunga den mi bida ta cu e la siña mi un sin fin di habilidad personal cu a y ta sirbi mi den mi bida personal y profesional te awe. Actua cu disciplina den tur situacion, tuma iniciativa y no warda pa otronan haci cos pa nos, sa organisa, sa con comunica cu tur hende y den tur situacion, uza argumento pa splica Bo punto di bista y convivi cu otronan, ta djis algun di e habilidadnan cu ami a siña den “club”. E experiencia y habilidadnan aki a bira parti di mi caracter personal. Ami ta ken mi ta awe, pa un



gran parti danki na mi educacion como Trupial. E amigonan cu mi a siña conoce for di aña 1959 ora mi a bira Trupial, ta mi amigonan te awe y lo keda amigonan fiel pa resto di mi bida. No tin palabra pa describi cuanto e formacion den “club” a haci pa mi y pa hopi di nos durante di nos bida.”

Futuro

E funcion grandi cu club di Trupial tabata tin pa comunidad di Aruba, ta obviamente hopi mas grandi cu e canto, musica, teatro y teatro di popchi cu e

ta conoci p’e. E rol grandi di formacion personal y civico di hobennan, tin un balor incalculabel. Ta importante pa nos comunidad tin institucionnan cu ta eherce e funcion di formacion aki, banda di e famia y scol. Pa e motibo aki, directiva actual y miembronan di club hubenil Trupial, ta tumando iniciativanan pa organisa actividadnan di Trupial pa hubentud awor den forman moderno, pero cu e metanan cu a caracteriza Trupial pa 60 aña caba.